

摘藻堂四庫全書薈要

集部

欽定四庫全書薈要

集部

皇清文穎卷首十五

六

詳校官候選知縣臣吳甸華



欽定四庫全書薈要卷一萬九千三百九十二

集部

皇清文頌卷首十五

御製文

九符頌

有序

粵若稽古典墳厥初生民低處者巢高處者穴取草木皮革羅鳥獸漉水物以為衣為食君臣父子上下長幼男女夫婦莫有倫紀聖人伏羲氏作始畫卦以

通神明之德類萬物之情造書契以治百官察萬民
政令行民用遵約束時則有龍馬負圖之應迨黃帝
軒轅氏宰制羣動垂衣以治作甲子天用錫以日月
合璧五星連珠造律呂播其八音而鳳凰巢阿閣與
蚩尤戰于涿鹿之野有雲氣止于帝上其後復有聖
人曰堯治厯象置州牧四岳明峻德以親九族協和
萬邦時則百獸率舞廷生五色瑞芝舜承是道重華
協于帝建學養老敕命賡歌卿雲復旦鳳凰來儀上

下草木鳥獸魚鼈咸若暨禹湯文武祗德建中無逸
執競時則有錫洛銜鉤鳴鳥流鳥之瑞揆古聖帝王
罔不得天嘉祥為受命之符亦罔不在德其惟時敘
罔不克加抑畏用兢業于有邦以答天之眷命自時
厥後由漢迄明英君謚辟天亦默相厥德眎其所履
以為協應其有矯誣諛佞詐作符瑞以欺中外以惑
蚩蚩氓天弗與民弗信也洪惟我

皇清

聖聖相承宅中圖治以撫四海德威並行汪濊暨訖
天用錫以洪庥敬戒不怠用培我不丕基雍正三年三
月太史奏日月合璧五星連珠

皇帝曰惟予

丕顯考聖祖克聖克仁克膺

天佑予一人是賴有司其擇吉薦牲以告

景陵羣臣固請陞殿受賀不許嗣是嘉禾瑞繭慶雲芝
草醴泉甘露河清鳳儀之瑞先後疊奏我

皇上祇承

天眷弗敢自居或則歸美

聖祖或則不以宣示且曰朕所喜者豐年為瑞及汝諸
臣宣力四方斯朕志也臣謹按王者必世而後仁天
人叶應嘉祥駢臻必俟仁而後益顯故生民公劉之
詩作于周召清廟明堂之什成于冲子我

太祖

太宗肇基新命我

世祖

聖祖克成

先志永綏兆民功崇德溥累洽重熙勝于成周我

皇上歸功

聖祖蓋本于世而後仁之義然非

皇上以聖承

聖覲光揚烈恩澤覃敷民飲其和

天歆其治應感之符必不若是速也且周之盛時雖宅

豐作洛撫有千八百國而幅員尚小孰若我

皇清東至於海南盡交趾西屆哈密北之七十四部羸
齋橐負致誠貢獻者歲歲不絕自京邑大都以至山
村僻壤耕鑿順則各勤所業武夫戰卒有老不識兵
戈者由斯以談

天之眷我

皇清于周有加焉記曰聖王在上天不愛道地不愛寶
人不愛情考之今時洵合其語

天子猶謙謙自牧敬德弗遑修我人事撫我烝黎方將
上溯堯舜欽明文思溫恭允塞之德中考湯武表正
萬邦敬勝義勝之徽以措諸政令以為萬載規敬迓
天庥永歎無極敢敬擇其符之顯奕者有九各繫以辭
以効頌祝之忱云爾

合璧連珠

昊天有命眷我

皇清奄有九有暨乎八紘以養以恬灝灝和寧曰維

聖祖文思欽明

皇帝繼之濬哲丕承

天鑒孔昭厥符惟禎自古在昔黃帝握厯璧合珠聯昭
哉藝極旃蒙之歲單闕之月聿見嘉祥其祥長發宿躔
營室位在姬訾雙壁輪囷五珠迤邐星臺告瑞太史書
呈

帝曰休哉惟

皇考寔膺爰陳於詞爰告於

陵有謙其躬有讓其衷惟

皇孝思格乎

蒼穹豈惟民哉居於昆蟲

黃河清

銀漢煥光河精發祥九曲彌亘浩渺汪洋宿列崑崙流
經積石匪澄伊黃浮天浴日曰既清止休符顯奕徐邳
淮泗千里靜碧馮夷息浪河伯安瀾五老上告紫蓋續
翻滌而濯矣既清且泚漉其濁矣既迅且駛鏡流瀾瀾

素波連連上暎下澈天水相鮮疇克澄其源疇克致其
然貺自

蒼旻景福永縣以光我萬年

孝陵神著

景陵靈芝

煌煌神著奕奕靈芝百莖九光神物應期

帝命東皇分植

兩陵無節而秀不根而榮潤以仙露燦於

寶城於皇

世祖開物成務遠至邇安金甌鞏固

皇帝敬承羨牆見慕齋戒神明達中飭度是用產著以
應嘉祚於皇

聖祖握符壽世育之以仁正之以義

皇帝敬承同歸一致乃文乃武以葆以藝是用產芝以
昭上瑞芝既蒼矣著既長矣貞符彰矣壽而臧矣暨萬
邦矣

嘉禾

有猗者禾在彼中田爾農來思越陌度阡芟之奕奕柞
之澤澤五穀既播三時無失載甲載圻載長載裒載穰
載實載碩載茂

帝實顧矣稷實助矣風披攬矣雨灌注矣綏我屢豐言
呈其瑞休我

皇風言多其穗遠自滇南近北

帝藉匪雙伊九匪寸伊尺先民有言食為民天百穀用

成自古有年

瑞繭

帝念民依惟農與桑孰飢莫食孰寒莫裳雕鏤必黜爰
勤三農纂組是省用紓女工

昊天惟顯聿降瑞繭瑞繭惟何萬蠶同簇曾不經緯曾
不杼柚苑窳致力西陵効勤神功默相嘉繭乃成爾純
爾素匪紅匪紫爾質爾實匪錦匪綺言徵其應言發其
祥祐此烝民成以報章太平之澤五十衣帛夏清冬溫

太和充溢

甘露

奕奕吳都沃壤甫甫有苗有禾有絲有紵其農于田侯
主侯旅其賈于市侯笑侯語維時之泰飲
帝之和含哺以嬉渥澤孔多

上天錫瑞降茲甘露零我吳都佑我休祚其凝如脂其
甘如飴湛湛瀼瀼如珠之垂曰既零止天下寧止曰既
溥止萬邦安止以兆嘉祥降福孔穰

醴泉

坤元載物厚德安貞孕祉毓祚乃効厥靈有醴者泉載
甘載旨莫尋其源載清載泚惟泉之功養而不窮我

皇之心濬哲宏通惟泉之瀉流膏潤下我

皇之澤物無遺者惟泉之源用之日新我

皇基命浩浩淵淵惟泉之發挹之不竭我

皇虛已聞言若決在易井六勿幕元吉勞民勸相中正

作繻

闕里慶雲

巍巍

宣聖上律下襲祖述憲章斯文與奕我

皇膺命心契聖時以養以教作君作師爰新闕里慶雲
式煥紉兮縵縵郁兮爛爛迺映杏壇迺覆檜榦金枝菊
鬱玉葉璀璨惟

帝之誠致雲之卿以彰我文明以貢我太平

房山鳳凰

四靈之一厥惟鳳凰感我

聖化遊我帝鄉帝鄉之南聿有房山雖雖喈喈來集其
巔亦集爰止惟

皇之祉藹藹吉人惟君子使六象其體六府孔修九苞
其文九夷來柔明明

上天鑒我

帝德朝陽叶應文明萬國

贊

四賢贊

有序

聖門弟子三千其賢者七十有二人史記家語各為
紀其姓氏考其事迹以垂之後世而能契夫子之心
傳得道統之正脉者則惟顏曾思孟四人顏子得克
已復禮之說曾子與聞一貫之傳親炙一堂若堯舜
禹之相授受實乎尚矣子思師事曾子發明中庸之
道而歸其功於為已謹獨孟子當戰國橫流之時私

淑子思距楊墨閑聖道而養氣之論為前聖所未發
昌黎韓子以為其功不在禹下有以也庚戌秋偶閱
有宋諸儒傳因思宋儒所宗者孔子之道也孔子之
道賴顏曾思孟而傳今聖廟祀典四子升配堂上為
百代之楷模因各係以贊用誌景行之私云爾

復聖

貧也者吾不知其所惡壽也者吾不知其所慕德以潤
身孰謂其貧心以傳道孰謂難老簞瓢陋巷至樂不移

仰高鑽堅三月無違夫子有言克已成性用致其功允
成復聖

宗聖

宣聖轍環在陳興歎孰是中行授茲一貫曾子孜孜惟
聖依歸唯而不疑以魯得之曾友輔仁任重道遠十傳
釋經超商軼偃念彼先子沂水春風淵源益粹篤寔春
容臨深履薄得正以終三千雖多獨得其宗

述聖

天地儲精川嶽萃靈是生仲尼玉振金聲世德作求孝
孫維則師曾傳孟誠身是力眷茲後學示我中庸位天
育物致和致中夫子道法堯舜文武紹乃家聲述乃文
祖

亞聖

戰國春秋又異其世陷溺人心豈惟功利時君爭雄處
士橫議為我無愛簧鼓樹幟魯連高風陳仲廉士所謂
英賢不過若是於此有人入孝出弟一髮千鈞道脉永

繫能不動心知言養氣治世之略堯舜仁義愛君澤民
惓惓餘意欲入孔門非孟何自孟丁其難顏丁其易語
嘿故殊道無二致卓哉亞聖功在天地

欽定四庫全書

皇清
卷十五

列代賢明妃后垂稱奕世者取繪十二繫以贊

西陵教蠶

在昔軒轅正妃嫫祖孕虞毓唐發湯啟武得姓十二如
千子乳創制蠶織窳陵為輔衣被天下功垂萬古後世
文勝乃崇黻黼

太姒誨子

昏姻匹妃王化之始維周勃興嗣徽太姒富而能儉貴
而不恃載在風詩葛覃卷耳更勤教誨有穀詒子昭哉

嗣服武周濟美

姜后脫簪

黃裳六五以順為正子有幾諫妻寧無諍卓哉姜后宮
闡之鏡金鑲進退爪跂行慶彤史攸司慎儀宜令雞鳴
朝盈脫珥待命

樊姬諫獵

先民有訓聿戒禽荒卓彼樊姬感悟楚莊有肉弗御乃
止王欲一語進賢霸功以下不謂婦人克相其君邈矣

邑姜十亂稱臣

燕姑夢蘭

乙始啓商蘭亦徵穆吉人在宮天使詒穀國香揚揚掌
夢其卜嚙彼小星三心五噉椒聊遠條爰昌七族鄭多
君子宣尼所錄

許后奉案

后母天下首崇儉德坤順乘乾柔嘉維則繫維許后貴
而能抑不忘寒微車服是飭日朝長樂用修婦職懿彼

芳型永為後式

婕妤當熊

圜熊攀檻羽林驚迸得人則止誰歟知命婉孌季女忠
貞維性直前當之熊為戢橫六宮咸忤七萃交病萬燕
啣泥天旌懿行

班姬辭輦

王者求賢爰載後車左右前後正士與俱景仰休風三
代之隆何逮漢季嬖媵輦從一言稱善如圜斯轉永鑒

班姬遠彼婉孌

馬后練衣

十歲持戶侯家整肅母儀天下六宮欽服練裙澣衣以
率戚族儉德之共綏將福祿車水馬雲明訓在牘豈伊
輝漢作則椒屋

徐妃直諫

元成有言願為良臣流風丕振乃自宮嬪徐妃上書東
征抗陳惜哉唐宗納而弗斷外事征討內營宮館頓忘

初年如園斯轉

昭容評詩

王稱降天乃生女子衡才汝耶孩笑而唯昆明賦詩綵
樓落紙辭華哲匠月旦自彼千載騷壇一時牛耳展如
之人文亦可喜

曹后重農

稼穡惟寶王政所崇襍末耜必親必躬維宋曹后播
種於宮彷彿親蠶獻繭效功克勲內治聿著芳踪噉彼

雕鏤何事傷農

欽定四庫全書

卷十五

銘

樂善堂銘

秉彝惟民氣具理存聖愚曷異善惡是分其善維何仁
義忠信知誘物化遂亡其正惟危惟微人欲天理操之
則存舍則已矣曷惟其操是曰樂善動靜弗違斯須弗
間我既受中我則蹈之我有秉彝我則好之聞人之善
我則友之非徒友之又克有之鷄鳴而起孳孳不已至
樂因心其味孔旨樂正好善鄒孟稱優東平樂善厥德

允修嗚呼念哉善可樂哉樂而不倦天性其培誠能好
之萬福之根反是則殆衆禍之門爰作斯銘服之無斁
朝斯夕斯果行育德

硯銘

迺潤迺堅惟淵惟默韜采含精在几之側用掩瑾瑜芳
流翰墨端人與處長資畜德

欽定四庫全書

卷十五

多福硯銘

惟古有訓斂時五福敷錫庶民幽贊化育承

天之序厥惟艱哉視民如傷孰釋予懷母曰九重之宮
而安其躬念鄙屋之竊歎每憂心以忡忡母曰八珍之
膳而供其宴念糲食之尚乏嗟何能以下燕錫福謂何
遑云建極期愆尤之或鮮恒小心而翼翼我心如是我
志在茲視此珉石貞堅不移庶

天

祖之鑒佑致風雨其咸時斯蒼生之多福即予一人之
多福永與薄海而共之

座右銘

維月在天常缺於盈維水在器既滿則傾古之哲人業
業兢兢慎彼盈滿若弗克勝意馳弗止防之若城言玷
不為守之如餅無往不復何陂匪平勿謂豫大而侈豐
亨矧茲九五位莫與京何求弗得何為弗成縱欲安止
凜涉春冰適口斯已那事嚮鯖容膝亦安奚必雕楹勞
於求賢逸於制情對天惟敬法祖惟誠憂其可恃懼其
可矜我志若斯我行未能苟行弗能言何足稱嗚呼小

子終始斯銘

負宸銘

大德曰生大寶曰位負宸荅陽天以民寄天視民視天
聽民聽民欲天從影隨響應何以守位曰惟求仁君止
於仁繼天生民告爾小子夙夜敬止仁遠乎哉及之須
跂

嘉量銘

皇子

聖祖建極憲天叶度律均鐘洞契元聲微顯闡幽何

天衢亨小子纘緒寰區撫臨叶協時月正日同律度量

衡製茲法器列於大廷匪作伊述大猷敬承遵鐘得度
率度量成量為權輿律諧六英猗

聖合

天

天心

聖明七政是齊為萬世法程如衡無私如權不疑如度
制節如量祇平律得環中紹

天明命

叶

永寶用享子孫繩繩我日斯邁而月斯征中

元甲子乾隆御銘

箴

七情箴

喜

萬類靜觀意愜斯喜神動天隨油然難已宣心之和導
氣之滯不極不淫歸於有制禮樂以飾百度惟熙樂以
天下奉此無私

怒

相彼天道有溫有肅維人肖天喜怒倚伏情炎於中莫

之敢觸所貴中節雷霆亦福嗃嗃毋過悻悻勿遷和厥
心性以師聖賢

哀

宣文有言哀而不傷感物切慮如川有防當其一往啾
愴懊咿罔識止節心悴神疲噍殺匪正毀滅匪宜閑之
以則庶無倚毗

懼

萬幾待理知懼鮮失業業兢兢一日二日馭朽為戒臨

深是怵於昭上帝相在爾室式茲不聞所其無逸惟敬
勝怠動獲貞吉

愛

人有秉彝徵於好德善善欲長賢賢易色所以孔子曰
生也直疏亦不忘親亦不暱愛所當愛爵賞罔忒擴我
天和容保萬國

惡

性本無偽情生好惡俎徹鮑魚往訓攸著毋設成心因

物以付智鏡在躬先覺有素郊遂是移僉壬必錯中正
和平萬流景附

欲

養心有要道在寡欲從之則危淡泊宜勗緬維曩哲垂
訓窒慾非禮必斥奉身如玉一人居高九有咸矚不邇
不殖永保天祿

五事箴

貌

懿戒有訓抑抑威儀洪範五事始貌終思動罔或愆敬
義夾持作肅惟恭非禮弗為顧諟明命日監在茲輯柔
爾顏友君子時屋漏有愧差之毫釐顯印令望夙夜是
祗毋尚巖巖咫尺天威毋示訑訑右史有司溫恭允塞
為德之基樹之軌範視此箴辭

言

恢恢寰宇一人是主維命靡常有德斯祐王言如綸被
乎下土無易由言惟敬作所彛訓聿昭四方是矩卓彼
前王樹茲諫鼓柔亦不茹剛亦不吐進彼嘉言袞闕堪
補聲為之律毋逞喜怒白圭謹言玷不在鉅金入三緘
非禮勿語從斯作入敬茲九五

視

維目司視其德曰明明有由蔽物引欲萌伊古有訓五
色目盲勿眩錦繡勤省農耕勿玩珠玉企望賢能知人

則哲體察物情曰視有要視於無形如水如鑑萬象自
呈靜虛動燭其本必清垂旒端冕儲神致精日月環照
無幽弗瑩克艱厥后永正玉衡

聽

宣聖有言非禮勿聽矧維建極承天永命惟精惟一敬
勝義勝何以達聰容納諫諍執兩用中旌賢表正既高
乃聽亦遠彼佞五音耳亂樂必放鄭九歌驗民八風體
政亦越卷阿矢音有咏雖隔九重而知民病雖聆萬言

而執一柄毋俾聽熒尚其居敬

思

基命宥密厥惟思哉翼翼小心為德之亥是惟弗思思則弗回勿狃宴安而遺遠懷勿侈豫大而弛心齋貌恭言從匪思曷階視明聽聰維思是裁無黨無偏惺惺靈臺勿縱其欲縱欲成災克已復禮四德具該朝斯夕斯天鑒恢恢告我後人皇圖永培

文

告風神文

維

神大元中精輔翊生成以吹以噓百昌勾萌昔我

皇考作是靈宇在紫禁巽方維歷有年所側聞曩時旱
魃為災彭怒漲天繼日以靈我

考竭誠爰命宗枝曰帛曰牲祝史致辭遂蒙

神庥駭颺為收禾黍沐澤乃亦有秋茲者雪早於冬雨

旱於春自春徂夏震雷無聞山川出雲慶散於風不惟
其景乃惟其終曰予不德小民何辜無麥無禾渺渺愁
予曰維百神各有攸職功在蒼生乃廟而食用是陳詞
祈

神之佑致是咎徵皆予之咎願勅飛廉速收其暴油雲
以作雨師前導曰予不誠

明神之欺降罪於予予其敢辭屏息以待惟

神之思

皇清文頴卷首十五

欽定四庫全書薈要卷一萬九千三百九十三

集部

皇清文頴卷首十六

御製文

碑文

泰陵聖德神功碑

洪惟我

聖祖仁皇帝統承

三聖之謨烈奄奠萬方撫臨天下六十有一年實兼開

創與守成之事爰自綏靖南荒剪除三孽而後惟務以
深仁厚澤淪浹中外俾涵泳優游四方從欲而勵精圖
治悠久無疆晚歲之政尤欲申嚴庶務以正官方糾詰
敝民以清禮俗以明作濟惇大以節制保豐亨故我
皇考嗣承丕基凡誠孝中正寬仁之大原無一不與
聖祖同揆至用人行政規模則稍有變通以求繼志述
事之盡善惟

皇考神聖之姿默契

聖祖是以膺付託之重任而宏開夫萬年有道之長惟
皇考誠敬之德簡在

帝心是以致嘉祥之駢臻而即驗於四海於變之盛雖
十三年之憂勞無一日一時少釋於

宸衷而所以貽我子孫臣庶億萬禩之樂利無窮者誠
如天地之無不幬載也

皇考世宗敬天昌運建中表正文武英明寬仁信毅大
孝至誠憲皇帝

聖祖合天弘運文武睿哲恭儉寬裕孝敬誠信中和功德大成仁皇帝第四子也

母孝恭仁皇后在妊時夢月中仙娥授以神子既覺而誕生

皇考

皇考幼而徇齊天性仁孝

聖祖恩眷踰常八歲時患腹疾

皇祖方巡狩塞外聞之遽馳歸一晝夜而至其篤愛有

如此者奉事

庭闈數十年深愛慤敬無一言一動不允當

皇祖之心每語衆稱為至孝先是舊皇太子贈理親王之未得罪也

皇考小心承順恪盡臣弟禮而王恐

聖祖眷愛日隆有妨於已遂至以非理相加

皇考每順受之而剛正之氣亦不為少屈律已則篤謹有加焉及歲戊子王以罪廢居常進諛者多背離相忌

者率傾陷禍且不測

皇考多方保護以悃忱惻怛感慰

聖祖之心而曲為王解始獲矜容王乃愧悔自失東宮
舊屬咸灑泣驚頌

聖德方是時

聖祖違和又以允禔允禩等屢作非彝以干

天怒居常鬱鬱病勢增劇

皇考竭心孝養凡百躬親靡晝靡夜逮四閱月

聖躬乃安及理親王再廢

聖祖春秋益高諸王中私懷覬覦者往往矯飾名譽私樹黨援而

皇考絕不以一事自表異友於兄弟均平如一莫不同其憂喜軫其疾痛其自取咎殃者亦不避嫌疑力為調劑自內外族姻左右大臣以及近侍宿衛無一人往來親密者

聖祖用是灼知

聖德淵懿大義明著無黨無偏足以膺

宗社臣民之付屬也及遭大故水漿不入於口以乾清
宮東廡為倚廬素服齋居養心殿三年如一日每遇朔
奠殷祭及獻食

壽皇殿悲不自勝哀動左右

躬送

梓宮安葬

景陵

仁壽皇太后升遐哀誠一如初禮凡

太廟

郊壇必躬必親致齋致愍觀者罔不肅然起敬每遇水旱之祲輒愀然曰

上天譴責朕躬命直省旬月奏報雨雪苟應時則喜動顏色或過期即減常膳元年五月京畿旱虔禱於宮中自晨至夕不膳霖雨立沛蓋

皇考深念所任受

皇天暨

列祖者惟茲天下之蒸黎故休戚相關如保赤子而民之所以安者存乎政政之所以舉者存乎人故宵衣旰食日有孜孜尤以是為先務焉念民所苦病者莫若賦重而刑濫有司遇災祲而不恤巧法侵漁或惰侈以自耗致民俗之日偷逐姦利縱淫樂聚徒鬪狠若是者皆盜賊之源也

皇考即位之元年即大免直省逋賦陝西甘肅二省以

軍興運餉其所供賦稅無歲不蒙豁免七年至九年輪
蠲各省賦稅有差自元季張士誠據蘇松嘉湖陳友諒
據南昌袁瑞與明太祖苦戰於江東西橫斂以給軍終
明之世故籍未改

特命永除數郡浮糧著為令典凡直省報災朝聞發不
待夕夕聞發不待朝每語近臣朕蠲租發賑如救焚拯
溺猶恐災黎之鮮有濟也彼視民之傷與己若無與者
獨何心哉常念水土為農田之本而救荒之政莫要於

興工築以聚貧民遂博求海內水利修川防俾各省河
渠湖澤歲久或淤塞為連州比郡農商害者咸開濬之
京畿則

命怡親王大學士朱軾經理水利營田官開水田數萬
頃聽民自占者不與十餘年中費數百萬貧民皆取食
焉洪澤湖都受淮流廣數百里恃高家堰為關鍵以束
淮而漱黃下河七州縣民命繫焉

發帑銀百萬盡改石工浙江松江海塘經潮水屢漲修

築相繼費數百萬濱海之民始得安衽席無為魚之患
往者封疆大吏好因事以自為功有司承迎以速進取
之路凡有興作及賑災動稱捐助或曰小民樂輸

皇考再三諭禁以蘇民困州縣巧取有禁門關苛索有
禁而民隱之萬難上達者莫不在

皇考洞鑒之中每遇重囚即深厪

睿懷屢飭法司必三覆奏好生之德發於不能自己者
如此念刑罰所以濟政教之窮必修禮正俗乃可清其

源詳注

聖祖仁皇帝諭旨十六條

親製勸農種樹之詔

御書刊示四方

命九卿詳定貴賤服色兵民婚喪禮制實舉孝義貞節
分遣御史巡行直省常恐所任非人則雖有良法美意
德難下究教不虛行故搜揚俊乂立賢無方自唐宋以
後秩祿不足以贍庶官不肖者各以他途取之用此苞

苴盛行不可遏止

皇考於外省督撫以及州縣親民之官各賜養廉較正
祿數十百倍其在京師卿貳則賜雙俸司旅並給飯費
雖閒曹職官亦準俸銀之數賜之廩穀而寡廉鮮恥巧
取以殃民者法亦有所必行焉左右輔弼及封疆重臣
忠勤夙著猷績彰聞則推誠倚任坦然不疑俾得展盡
底蘊而常戒以面從責以啟沃優容寵賚十百於尋常
其有恃功驕蹇植黨營私者則法立誅必而忠直善良

即時有失誤屢被譴訶卒保全其終始建賢良祠崇祀累朝碩輔其餘著勛伐効命疆場者皆錄用其後人又念士者民之表儀而庶官所由備也故廣其登進之途而董之以教元年

命郡州縣學官必用正途二年

躬詣太學頒訓飭士子文四年

命直省督學舉英才八年舉通曉性理舉人八人並賜進士各省會俱特建書院取之之廣恤之之周如此兵

者民之衛藩而國威之所蓄也故勤其蒐簡之政而曲體其情

命提鎮考核將校必察其訓練拊循之實毋得徇私提鎮之優劣一以整飭將校訓練行伍和輯兵民定之士伍則正糧之外別發帑銀俾軍帥營運以恤其婚喪蓋皇考涖官馭將勤民養士整軍恤衆使文武並勵中外相維制防曲盡如此重念八旂乃國家根本內外大小臣工士民軍吏所觀式也故所以教之養之取之任之

察其情而優恤之者尤詳且備焉元年即

命舉人庠生之服公事者各還家專力於學誦設八旂
官學各就其方簡其士之秀異者而官教之

命諸王察舉孝弟守分力學者以承平日久生齒愈繁
取八旂餘丁四千八百人為教養兵歲給十七萬有奇
自五旂諸王不得以旂分人員多供差役擅治其罪下
此正副都統及叅領佐領不得苛索外吏財物竊嘗審
究

皇考治法之源流然後古聖王所為以天下為一家以中國為一人者其規模氣象始可得而見焉

皇考自宗親戚畹勲舊以及八旂之士衆自京師畿輔以及九州四海之軍民惟恐其疾苦之蔽壅禮俗之衰惡一如一身之中毛髮有觸而必動雖外藩蒙古皆如家人父子其職官並予俸祿兵衆咸給月糧土默特守臺站人歲時有賞用此凡有征討外藩効命屢

諭蒙古王貝勒宜愛民惠下其子弟之俊秀者或在內

庭教養之

賜安南以隙地減朝鮮琉球貢物厚朝鮮俄羅斯國人之賞賚給琉球來學者歸國之道齋不獨澤流方外而聲教亦漸被於遐荒十有三年之間宵衣旰食無晷刻之寧不謂天下已治萬民已安而少懈夫朝乾夕惕之皇衷故以事

天之誠敬昭事百神而神無不格以法祖之仁孝錫類萬物而物無不孚至於

孔子德配天地尤加崇禮王爵之封上及五世跪獻之
禮首著上丁詳定配享先賢增置五經博士皆前古所
未有也教養宗室而寬其拘禁者自登

宸極即封理親王子弘皙為郡王而於理親王未降一
旨未遣一使曰吾不欲受其拜並聞感恩之言也

錫賚頻仍惟

命內監傳送且教以詢所從來勿令告以上賜及王薨
躬臨哭奠追贈理親王命弘皙進襲親王爵分封供具

特厚怡賢親王之喪

躬臨哭奠哀慟久而不已自戊子年後允禩允禔輩莫
不妄冀非分結黨樹援嘗觸怒

聖祖

聖祖降硃批諭

皇考及諸王云朕與允禩父子之義已絕及

皇考嗣位重念弟兄情且知彼明敏能任事爰命輔政
加恩信用冀以感悟其心密封

皇祖旨於內閣不以宣示外人乃允禩不但不改悔且
心懷怨望怙惡不悛允禩在西寧多為不法顯悖臣禮
皇考雖申告中外明正其罪絕其屬籍而兩人猶得以
天年終罰弗及嗣自

御極以後瑞應駢至日月如合璧五星如聯珠黃河之
清自陝州至邳宿二旬有五目不變鳳集麟生慶雲甘
露靈芝嘉穀之祥不可勝紀

皇考每見奏章必深自警惕咨戒臣工苟德政之不修

雖天瑞不足恃也彰明人紀更定刑章凡繼母虐殺前
子以所生子抵法無故杖殺僕婢者分別重輕治罪訪
明太祖本支裔孫襲封侯爵以承其宗祀自明初紹興
有惰民靖難後諸臣抗命者子女多發山西為樂戶數
百年相沿未革一旦去籍為良民

命下之日人皆流涕自準噶爾擾邊

聖祖仁皇帝宿兵西北陲以保舊屬諸藩青海之平也
彼又納我叛臣雖屢加訓告襲盜不休故定議濯征為

一勞永逸計及十年大破之於喀爾喀之地邊將爭言
宜乘時進剿

皇考念彼遠處外夷武不可黷乃遣使諭告決意罷兵
西南洞苗自古為附近州縣之害自平定廣烏蒙古州
歸義開地三千里而時戒邊疆大吏為善後之謀敬惟
皇考自始至終所以蒞官勤民教士恤軍安內馭外者
無不體之以誠本之以孝用之以中持之以正育之以
仁撫之以寬與

聖祖仁皇帝若合符節而更化砥俗使天下遵道遵路如優恤宗室而禮度必謹於防維愛禮大臣而法禁必行於貴近搜羅才俊而甄別不漏於昏庸教育士民而捕誥獨嚴於敗類蓋非此不足以移文恬武嬉陰私交結之風革吏蠹民偷險戾奸欺之習未嘗非

聖祖晚年整肅官方矯除薄俗之遺意也是以數年之後蒸蒸日上變外自郡州縣吏私餽不行於大府監司內而閣部院司臺垣不敢以己事干外吏倉庫侵蝕者所

在充盈庠序鮮囂陵之士門關無苛索之兵蠹吏散朋
奸民徙業孔子所稱善繼人之志善述人之事者我
皇考實克當之

皇考即位之元年八月即

手書建儲事密封宮庭布告羣臣八年六月

聖躬違和

特召臣及莊親王果親王和親王大學士內大臣數人

入見

面諭遺詔大意謂朕夙夜憂勤惟體

聖祖之心以為心法

聖祖之政以為政因見人情澆薄官吏徇私罔知改省
不得不懲治以戒將來故有從前條例本嚴而改易從
寬者乃原議未協朕與廷臣悉心酌定可垂永久有從
前條例本寬而改易從嚴者本欲俟諸弊革除之後酌
復舊章乃知

皇考聖智天縱灼見

皇祖不言之意以就前功而隨時取中用建民極蓋
聖祖時瘡痍初復非徧覆包涵不足以厚生養而定民
志

皇考繼承之初則政寬而奸伏物盛而蘖萌非廓清釐
剔大為之防其流將溢漫而不可以長久

兩朝聖治正如天地四時之運相推相代以成歲功先
儒所謂雖有改制之名而無變道之實者此也

皇考聖意原欲大加整剔使弊絕風清人人皆知理法

而後布恩施德以培國家萬年元氣

昊天不弔未假之年使十有三年憊精勞神之

聖心猶未釋於

龍馭上賓之日而廣大欲沛之澤不及旁流汪濊以遂
皇考之初志而親見黎民徧德之休也嗚呼痛哉雍正
十三年八月己丑

皇考崩

聖壽五十有八乾隆二年三月庚寅葬

泰陵小子

謹拜稽首而獻頌曰

惟

天行健運而不息陰陽甄陶萬殊一則惟

聖時憲建極宜民其用曷先曰義與仁當豐而亨節亦
潛滋既大且豫必戒其隨

皇帝繼序履盛持盈日昃雨潤雷動風行

皇天所付惟此嘉師

四聖容保予承予依曰予作君在厚其生其災其害我

躬是膺曰予作師在正其德其薄其頑我躬之忒設監
置牧惟民之安苟非其人慮為民殘心膺股肱信賢不
貳庶司百吏開誠以示片言必錄小善必登耳提面命
毋或荒寧官箴之敗交以賄成賢奸可易白黑可更植
黨背公譎張譎誑上下相蒙斯民曷望重增秩祿用絕
苞苴私塗既閉邦經可臚旌廉擢能俾欽俾慕誅恣懲
貪俾愧俾寤九官承式庶事寡愆大府整躬百城晏眠
敬刑明罰亂獄無滋歲會月要出納無欺救荒拯溺家

沾戶浹增防浚川役均廩給興禮明教以示之則禁暴
詰奸以除其慝煌煌

帝京政肅風清豪強屏息奸宄潛形博戲鬪囂鷄茵雞
柵奇技淫聲兒童莫識近自畿甸周於海隅山行野宿
刁桡無虞曷占政成官稱其職曷占民安鼓腹作息
皇帝致治身為表儀由中達外誠一無私

郊

廟明裡洞洞屬屬

闕廷泣政雍雍穆穆大孝備矣昭哉嗣服眷舊親賢久而彌篤近承德意遠樹風聲父勉其子弟祇其兄未明求衣日昃不食一日萬幾是匡是飭

天現其光珠聯璧合地効其靈河清川翕畝穗叢岐陵芝結紐鳳翽麟遊近在郊輦

皇帝曰咨母安母豫我君我臣惟戒惟懼遇災而懼災可為祥以祥為常志將日荒重道崇文德心是懋張皇六師武不敢究天衢如砥萬國朝宗開我明堂四裔來

同盛德之氣生物之元於時為春在人曰仁尊嚴之氣
物以凝閔於時為秋在人曰義巍巍
聖皇是則是效雨露雷霆罔非至教

德厚於地

智崇如天儀我後昆億萬斯年

欽定四庫全書

皇清文獻
卷十六

文廟碑文

天生烝民若有恒性人道立焉亶生聰明神聖作之君
作之師以厚其生以正其德綱常之所以不墜倫類之
所以相維相保於天地間者斯焉是賴古聖皇繼天立
極君師之道兼隆亶乎尚矣繼是以來雖代有君而克
盡其為君之道者蓋寡若夫同天地亶古今繼往聖開
來世特立為師之道於宇宙間者則惟我
先師孔子一人敬維

孔子集羣聖之大成祖述憲章垂教萬世使後之帝王
建極綏猷得有所遵循以求道法治法之大全由之則
治悖之則亂大哉

孔子功參乎覆載明並乎日月生民以來未有盛焉者
也我

列祖撫御寰區叙彞倫明禮樂誠民阜俗一惟

孔子所傳之大經大法是矩是式微言奧義悉推闡而
表章之統緒相承心源符契欽敬追崇之盛典超越往

代具在彝章予小子懋學書聞景行志切逮寅承丕緒
祇奉

先猷夙夜兢兢繹思聖道越乾隆三年季春上日躬釋
奠於

先師前期飭官庀材崇飾廟貌特命大成殿大成門覆
以黃瓦崇聖祠覆以綠瓦稱朕慕道崇師至意記曰禮
時為大宜次之稱次之先王之制禮也順於鬼神合於
人心惟其稱而已太學者帝王尊師之地盡禮備物以

明尊也稱其德而不為過宜莫大焉抑非以炫耳目之觀也欽宗至道敷政教以淑羣黎法

祖隆

師罔敢或斁俾薄海內外無一夫不與被

聖人之澤斯朕志也夫乾隆四年己未用允廷臣之請
勒文紀事以垂示於奕世系以詩曰於昭道統淵源三
五

至聖挺生立極萬古贊修刪定為帝王師天地悠久斯

文在茲惟我

祖宗惇崇典禮爰謁林廟爰封祖禰予膺鴻緒彝憲是
承釋奠視學大昕鼓徵萬仞宮牆圜橋首善笙鏞斯陳
俎豆斯薦耽耽翼翼鳥革翬飛制符宸居金碧流輝丕
煥宏模神明所宅玉振金聲永揚教澤式眎兆庶式育
才賢光宣文治億萬斯年

重建泰山神廟碑文

國家秩祀之典方望實惟最重而泰山為五嶽宗長功用顯彰為德尤盛廟貌之在山巔者歷有年所曩乎邈矣鬱攸不戒宜用鼎新粵以乾隆六年特遣專官董建靈宇殿庭廊廡門序觀闕宗闕壯麗烏斯革翬斯飛耽耽翼翼琉璃丹碧輝映日星黼座璇題像設神御穆然其容范金惟肖山半為香亭寶鼎中峙覆以重簷載陟斯憇興仰止焉鳩役庀材胥出內帑公旬不勞經費不

損凡土木之工若干閱期有六旬而竣朕惟岱為方岳
昉於虞書列於禹貢紀於周官詳於春秋傳蓋河涕淮
海川瀆環匯扶輿積高之氣磅礴蘊結靈淑鍾萃蔚為
神臯奠坤維而翊天緯方位屬震盛德在木得造化生
生之元故觸石出雲不崇朝而徧雨天下功至神也澤
至溥也我

列祖撫一海寓懷保蒸黎一體天地大生廣生之心為
神人主明德馨香

神庥昭格予一人寅承基緒夙夜兢兢事神保民罔不
祇肅彼登封告成刻石紀號金泥玉檢往牒所誇矯誣
侈大之事繫寡昧所不敢知而又寧方夏阜殖羣生俾
庶而富俾壽而臧尚其惠邀嘉貺錫美介祉以篤我國
家無疆之慶則所以崇禮展敬揭虔妥靈其何敢後焉
爰勒詞琬琰昭示永永系以銘曰

巖巖泰山峻極於天有虞肆覲肇祀用虔牲幣祝號秩
視三公匪僭匪瀆曰以報功伊

神之功霖雨萬國載生載殖食我

神力春也其時仁也其德體乾之元以立坤極奕奕新
廟穹峙層霄易陶以金以禦剛飈雲生桂棟雨挾松濤
俯瞰博桑日觀崢嶸雕甍珠網鋪金城玉紫殿靚深黼
袞端穆月馭星駟林霏馥郁靈貺孔時錫茲介福降神
毓秀賢哲克生時暘時雨百穀以成陋彼陟封七十二
代成民致神往訓是佩肸蠁斯通鑑格斯在祇薦明禋
於萬千載

安佑宮碑文

序昭穆以祀其先祖有功而宗有德建報本之義為萬古之經者宗廟之制三代以上即有之繼人之志述人之事者所當謹也設裳衣以如其生朔有酌而望有獻盡事親之禮抒不匱之思者原廟之制西漢以來始有之繼人之志述人之事者弗敢廢也後世神御殿亦猶漢原廟之義耶然漢之原廟不過月出衣冠一遊耳至宋之時乃有神御之名蓋奉安列朝御容所也上元結

燈樓寒食設秋千其視漢為已備矣而宗建徧郡國奉祀或禪院識者多議其非禮焉我

皇祖聖祖仁皇帝在位六十餘年恩澤旁覃僻邑窮谷圓頂方趾之衆飲其德而不知子孫臣庶躬被教育者宜其謳歌慨慕而無已思也是以雍正元年我

皇考世宗憲皇帝謹就大內壽皇殿奉安

御容朔望瞻禮牲新時薦而於

皇祖所幸暢春園亦陳薦如禮非輕為此創舉也我

皇祖有非常之澤及天下是以

皇考合天下之情亦以非常之禮報之有漢宋備物備禮之誠而無宋代徧及郡國祀繁致褻之譏也予小子嬛嬛在疚顧謚

皇考之陟降敕明且凜紹庭良法美政布在方冊者謹守而弗敢失既就壽皇殿東室虔奉

皇考御容以配

皇祖念茲圓明園我

皇考向日遊觀在園在沼之地也其何忍忽視爰擇爽
塏之地具殿廡之規為室九敬奉

皇祖御容於中奉

皇考配東一室匪惟予小子罔極之思羹牆之慕藉以
稍抒亦欲使後世子孫凜覲揚之志勤堂構之基所謂
禮以義起有其舉之莫敢廢也鳩工於乾隆庚申而歲
事於癸亥所司以碑文請乃序其事如左而繫之以詩
懿茲苑囿


皇考所作土階茅茨遵堯之約匪誇丹雘有窅谿壑匪
沸管絃有唳雲鶴詎美之求惟

聖所樂我龍受之中心惕若宅是廣居九有是度

祖武斯繩宏規敢略爰相其地載斟載酌爰創其模載
經載落廟貌巖巖堂皇綽綽有閑旅楹有挺松栢周之
以郭其郭嶽嶽環之以池其池瀼瀼其水何有鳶飛魚
躍其宇何有網軒珠箔神御孔安心乎莫莫來覲來齋
曰望曰朔於萬斯年予誠永託



皇清文穎卷首十六



總校官庶吉士

臣張能照

校對官修撰

臣張書勲

謄錄監生

臣繆謨

欽定四庫全書薈要

集部

皇清文穎卷首十七

八

詳校官候選知縣臣吳甸華



欽定四庫全書薈要卷一萬九千三百九十四

集部

皇清文穎卷首十七

御製文


耕藉賦并序

皇上御宇之五年青帝司方之二月春風普扇陽德方
亨

天子乃耕于千畝之田禮也

臣

聞聖王務本耕藉以勸

農功明主孝親親推以供祀事我

皇上孝以事

親勤以率民二載甲辰既耕加一茲又

躬行耕藉之禮急粢盛重民食致誠匪懈其典則隆洪
惟我

皇上道洽天人化霑草木誕敷文德廣運聖謨渥澤周
于羣生至治昭乎天壤乃猶頻興重農之典時勤保
介之咨追厥唐虞播種之踪為彼率土民人之勸萬

衆觀儀上農終畝迨厥秋成登于天廩薦之

皇天供于

祖考臣知

皇天

祖考鑒

皇上之精誠歆

皇上之大孝必錫嘏降祉永保無疆明德惟馨聿懷多

福臣不勝踴躍懼忤之至謹拜手稽首而獻賦曰

繫惟重華之命稷兮播穀實繼乎禹功必烝民之粒食
兮始風動而時雍親耕肇于姬籍兮意往聖之皆同我
大君之首出兮屢三推以勸農宣玉食之是享兮惟簠
簋之虔供秉耒耜以率先兮符澤物之元功于是春陽
初布青帝司方嘉萬物之昭蘇值千卉之勾萌農祥既
見土脈方昌協風應律陽氣滋彰

皇帝乃順月令撫嘉辰念民力飭甸人當前期而致敬
用有事于青春于焉載師清畿封人淨路常伯獻儀掌

舍設栢爾乃青壇蔚其聳立華葦森其崔巍雲移翠幕
柳拂青幃啟千畦之平壤欣四塗之腴肥逮夫元辰既
屆曉色方鮮

天子則御藻冕佩蒼瑱被龍袞鳴和鸞載青旗揚朱旃
接游車之鱗鱗施梁輶之芟芟爾乃稷官將近樂具班
陳

天子乃降御輦饗農神祈嘉穀焚燎薪禮成而退有事
藉田衣被襜褕趾履陌阡王侯衛後虎賁導前太僕秉

轡牽牛奉鞭乃歷廣場撫御耦執縻手底不辭瘁乎三
推載耒御間試躬親乎千畝王公卿貳或五或九白叟
黃童歌呼奔走維誠敬之聿昭知樂愷之孔厚于是黛
耜方輟紺轅遂旋雨廡纖以灑潤風縹緲而淨天侍從
偕來睹

天顏之有喜馨香上達卜慶兆于豐年夫元鳳下親耕
之詔永平垂開耜之篇魏主望公田而發趾晉帝帥羣
后以祀先尚傳為古今之盛事並書之史冊而爛然况

乎我

皇至仁大知既事治而府修亦成天而平地修稼穡以
勤民謹神倉而歲事所無逸以知艱重明染而將祭三
春暖兮播百穀四野寧兮進雙穗也哉乃為之歌曰田
之興兮稷之功澤萬物兮助鴻濛我

皇展事兮千耦其同和協天人兮一哉

皇衷既耕既耨兮我稼其豐爰播爰植兮麻麥朦朦又
歌曰思樂甸畿千頃其耦

鸞輅載臨

躬耕其畝登于秋廩斯箱斯倉薦之
宗廟供之明堂神之格思綏祉無疆
一人有慶永奠萬邦

四時勤政賦

惟聖人之建極兮法天運以自強歷四時以勤政兮亦
日就而月將堯兢兢而舜業業兮萃芳軌于我

皇禹惜陰而湯浴德兮繫日進以無疆道既立而化淳
兮美光天之徧育如雲日之為瞻兮統要荒而臣服大
哉

帝德輝光被乎八埏允矣

皇風恩波沃乎四瀆爾其一日萬幾宵衣旰食誦抑戒

陳無逸昧爽丕顯夜以繼日旣勞謙而匪懈亦健行而
不息勤問夜于未央雖寸晷而猶惜若乃春居東以首
歲夏居南而執衡秋居西而司藏冬居北而主成春動
也物以之起夏任也物以之生秋收也物以之結冬凍
也物以之貞聖人推本萬物之理而欽象四時之行政
刑準之以有度治教由是而皆平燠寒應候而時若雨
暘順序而咸亨此吾

皇四時之勤政而用致九有之和寧者也又若政要書

屏箴規刻珮日移崇政之餐汗浹延英之背彼古事之
云遠觀今茲之盛代厘夕惕與朝乾用持盈而保泰信
日昃而弗遑豈臣鄰之可貸

聖主圖治以勵精庶政分司而用乂于是喜而歌曰九
鼎奠兮泰階平

皇風普兮庶物亨萬邦惟懷兮歌永清

皇心猶戒兮無荒寧朝夕兢惕兮象天行錫極敷言兮
惟至誠拜手稽首兮于王庭

萬壽無疆兮道成

東郊迎春賦

震宮初動兮青帝司辰勾芒節屆兮木德惟仁條風入
律兮鳥歷紀新展東郊之盛禮兮觀畿甸之迎春旣備
禮而備儀兮亦有則而有倫蓋欽承上帝而敬授于下
民者也爾乃迎春東郊旣著于月令青珪禮神亦載于
周禮斗柄東指而萬物生地氣上騰而蟄蟲啟出土牛
以示農駕玉輅而虔祀于是服蒼玉載青旗宗伯前導
王公後隨有嚴有翼不疾不遲樂奏而凝寒頓減舞進

而陽和自滋于是歡迎白叟笑舞黃童夾道霏微而灑
雨平林縹緲而搖風喜鴻鈞之氣淑知大有之年豐自
南自北自西自東此皇都迎春之令典而萬國莫敢不
來同者也于是勅庶司決獄訟非終必赦惟祥是用象
暖律之發生乃省刑而寬衆又若降制詔勞三農助萌
陽勸田功法恩光之普扇布仁政以胥融于斯時也戶
裊綵旛簷飛輕燕柳綠綺宮梅榮芳殿和風拂兮簾惹
遊絲暖日長兮鶯啼睨睨金屏麗而帖寫宜春寶扇開

而漏傳玉箭溥禁裏之春光煦閭閻而皆徧乃為之歌
曰迎東郊兮肅以將舞雲翹兮歌青陽乘時布令兮德
施長億萬斯年兮紀春王

喜雨賦

客有駕輶軒乘雲輶展軫乎南畝縱轡于東郊遨遊客
與徘徊逍遙爾乃白雲起乎空谷甘霖降于崇朝震雷
燿燿飛電熒熒乃往田舍而息焉有二三老人逡巡而
前曰斯雨之降時則時矣膏澤之濡普而施矣抑誰之
功乎請吾子明言以告之客奮袂而起曰猗歟休哉盛
世之民也飲其德而不知其力坐吾明語子方今龍飛
九五聖人在位德配乾坤功參天地精誠通于神明政

教化乎萬類故上天眷命俾雨暘時若而萬方以治乃
至含哺鼓腹耕田鑿井者實不知帝力之賜也老人曰
聖人之德某旣知之矣請吾子賦雨之澤及蒼生者可
乎客曰若夫金烏收景層陰蔽空雷殷殷以振響電灼
灼以搖紅鼓河伯之驚濤涌海若之幽宮瀉天池之巨
浸走萬里之長虹遠迷三島近失千峰迴生意于衆卉
消渴望于三農此則雨之方作而其勢最雄也乃其雲
開雨止霽景澄鮮山宛宛其染翠木蓊蓊其逞妍鳥嚶

嚶其鳴樹草芊芊其含烟柳暗歸鴉簷喧乾鵲槐影濃
兮庭宇清花陰轉兮簾櫳薄纖歌動兮高樓紅袖飄兮
綺閣細帙開兮芸編博山焚兮繡幕莫不欣膏澤之滂
澍喜雷聲之頻落此又雨之既足而萬方共樂者也至
若烏犍耕白水之涯黔黎藝綠野之畝白叟歡呼黃童
奔走土脈旣滋兮禾麥如雲灌溉不勞兮田疇以阜爾
倉爾京爾荷爾負此又二三子所終日服事而知利我
之孔厚也于是老人倚杖而歌曰雨玉不可食兮曷若

嘉苗滿目屯黃雲雨金不可衣兮曷若五風十雨利耕
耘惟天降康兮稽首蒼旻惟皇感天兮永眷日勤千秋
萬歲兮樂吾之君

燈花賦

夫何三冬之夜永兮聽玉漏之丁丁耿宵寒之不寐兮
羌讀史而論經對銀燈之熠爍兮何用夫隨月與囊螢
松風蕭蕭於戶外兮爰閉牕而掩櫺獨兀坐于幽齋兮
賴詩書之是娛引短檠而置前兮瑤篇卷而復舒注膏
油以續餘燼兮光燦爛而晃如何生意之忽發兮開花
朶于斯須曾不根而自華兮焰炯炯而扶疎萼蓓蕾而
金輝兮葩晶熒而錦敷丹艷灼灼兮火葢煌煌離精發

瑞兮內隱外光飛蛾嬉其來往兮恍如蛺蝶探擷乎春
芳乍蔽乍虧兮若續若離匪青匪綠兮參錯歲華可遠
觀而不可近玩兮花無葉而有枝歷四時而皆榮兮又
如火蓮冬秀乎雪池爾乃釵綴玉蟲兮枝堆寶粟光炫
縑緗兮影搖帷幕度長夜之迢迢兮喜銀釭之續續靜
對而意益欲生閒吟而筆花交錯方作伴于形影兮信
有佐于誦讀若夫庭燎通晨九華達旦雞踏蓮花之巧
龍銜火樹之艷麗乎未央之宮燦乎承明之殿斯金闕

之壯觀豈書齋之清玩又若帝城三五上元佳時黿峰
千仞金蓮萬枝縟綵與繁光共絢銀花與寶炬爭奇固
遊觀之雜還非靜賞之所宜乃為之歌曰幻非幻兮色
可親實非實兮報先春朗瑤室兮席上珍照芸編兮日
日新

鳳凰來儀賦

以聖化感孚泰平瑞應為韻

惟

聖皇之建極兮膺九五之寶命沛仁恩于四海兮教化
洋溢乎萬姓天不愛道而地不愛寶兮百福畢致而延
慶乃威鳳之翔集兮符

一人之神聖嘉彼休徵應我

王化向畿輔而高騫覽德輝而載下惟羽族之三百實
超羣而莫亞

聖德惟純祥禽潛感稟鶉火之靈曜資和氣之融暖信
鹿後而麟前亦雞喙而燕頤必梧桐之是棲非琳瑯而
不嗽爾其九苞六象兮五色紛敷戴仁纓義兮蹈信惟
孚負禮向智兮順德不渝晨鳴賀世兮飛鳴郎都行鳴
歸嬉兮止鳴提扶是皆斯禽之神異掩餘瑞于瑤圖者
也若夫黃帝阿閣之巢雖雖喈喈帝嚳六英之舞萋萋
颺颺虞廷來儀而神人格岐山和鳴而聖道泰孰若當
郅治之休明集王畿而遠邁曠千古而一覩昭德感于

聖代是以六府治九功成金甌固泰階平上瑞駢臻歡
聲徧乎閭里嘉祥疊奏喜氣達于寰瀛乃為之歌曰鳳
凰來兮

皇之瑞集天畿兮拱

帝位

帝德光被兮靈祥萃

聖心彌寅兮勤自治敬

天貺兮罔或肆又歌曰吉士藹藹鳴鳥協應曷由臻茲

我

后德盛萬有千載遐荒安定

重修

闕里文廟告成賦

不鑠惟清

聖祖神宗既承顯之式穀允精一而執中欽明文思克
讓允恭洋溢涵煦萬國來同

皇上御極是法是則煥天下于文明登九有于衽席重
道而

先聖是欽崇儒而

素王惟式

天鑒孔昭佑我

一人謂

闕里之經營既久斯

尼山之廟貌宜新藉締造于昭代貽制作于

聖君

天子乃命司空勅匠作爾經爾營乃量乃度走羣靈而
驅八神鳩工徒而諮衆畧厠無間不注之巉巖伐泰嶠

嵩高之叅錯良材川委大木神輸授模定式審方辨隅
陶埴鍛厲之俱備丹青圻治之咸臚凡工倕與匠石莫
不奏伎而待須爾乃日嘉時良爰動馨聲鍤徒奮力鑿
人充盈既隤隤而甍甍亦登登而馮馮大治耀兮金烟
霏屑噴兮瓊英斧斤丁丁兮觀揀度之胥法繩墨綿綿
兮看約掇之咸平矯枉兮既直削腐兮用貞曉畚索索
晝杵訇訇俄而確輝玉礪采煥雲楣豐融曼衍揭業陸
離祕殿聳兮盤鳳傑閣矗兮卧螭何巨麗之方建乃卿

喬之呈奇曜藻流光兮鬱翁而承日麗懸華曳紫兮紉
縵以布天垂斯固天文與人文並燦聖居與聖澤偕丕
者也若乃級層階于東西拱脩廡于左右大成殿大成
門實

御筆之親書聖時門弘道門更

睿思之口授圭瓚俎豆之式新犧牲幣帛之加舊添配
祀之羣賢增執事之奔走色瓦頌自尚方

御碑摹以重鏤丹楹列乎瓌材采桷揭乎纖繡則其為

狀也邈穹隆以宏壯巨砰磷而窅冥殖殖兮其庭噲噲
兮其正宏卓爍以輝赫兮若燭龍蜿蜒而鬚鬣紛攢羅
以歲魄兮若巨鼇鼉巖而崢嶸斯翼斯棘兮屬閣道之
駸駸如松如竹兮衛鉤陳之縱橫倣巖廊而布象準魏
闕以為程礧礧既堅知為高之基下綺䟽交映悟立誠
之牖明至夫既落既成乃祭乃饗

命皇子而徂征昭

一人之敬仰牲牲肥腩黍稷豐穰衣冠肅恭進退雍容

籩豆既旅樽壘斯崇以間兮笙鏞於論兮鼓鐘神既妥
兮和冲降多福兮隆隆蓋尊

聖之典無以尚統前後而莫有或同者也于是為之歌
曰堂皇靈宇

天子是新既輪既奐乃珣乃璘杏壇葱鬱檜幹繽紛
宣聖是安佑我後人歷億萬禩丕煥斯文

萬壽日慶雲見苗疆賦

惟

皇清肇三韓而定業鞏盛京以立基既應天而昌運亦
撫民而順時

世祖白旄黃鉞仁義興師于是乎撫有四海宅燕京而
嚮離於皇

聖祖作則生知正義育仁以馭世制禮作樂以定規六
十一年之湛恩渥澤逮我

皇而克享其雍熙丕鑠

皇德

聖祖是式精神通于神明聲色允其恭默勤政亶乎八
年至仁敷乎萬國擊壤者歌何有之帝力含哺者順無
為之帝則

昊天曰明鑒我

皇情何祥勿應有瑞畢呈乃撝謙而自牧更持虛而若
盈或歸

親而不居或讓美而弗稱斯固

一人之大德巍巍蕩蕩而難名者也歲在上章月惟淵
獻

帝澤均施

皇風普扇坤輿載闢紅苗允致其共球版籍初登六里
亦安其服旬乃宣布化誨之初辰實誕降吾

皇之聖旦鴨保寨之大吏初臨地良坡之苗民同忭池
河營之猺獞咸臻萬榮江之老幼共見異地而

王命頒陳同時而卿雲燦爛歸誠之愚民稽首何異華
封之祝三宣意之將吏傾心允似嵩高之呼萬氣氤捧
日擘碎錦之千重縹緲麗天幻榮光于萬變為樓為閣
拱黃道以旁敷非霧非烟被清風而不散五文絢彩于
璇霄十色流虹於碧漢此重譯之來不聞奏于越裳七
旬之格不聞歌其糾縵者也況于嘉時正午恰當

景命之辰厯未及申允愜綿長之願彼夫升堂于黃帝
之時起河于伊耆之代入房于殷湯之宮浮洛于周成

之載穆天子之王母為謠漢武帝之泰山紀再或一色
而無文或旋聚而忽分豈如歷三時之久當

聖壽之辰現新附之地昭歸化之民又何足稱函關紫
氣帝鄉白雲哉乃為之歌曰於赫

聖治兮格于

蒼天嘉瑞聿昭兮于彼苗田格愚孚頑兮

王化普宣祝我

聖壽兮億萬斯年

欽定四庫全書

卷十七

指佞草賦

銅龍曉啟玉漏初傳氤氲曙色縹緲祥烟朝萬國之球
壁列百辟之班聯爰有靈苗曰指佞草非時不見實天
地之無私應候而生允皇王之有道則見夫峙丹陛而
葱菁秀彤墀而縹緲金莖露灑潤貞幹之稜稜玉殿香
凝靄斜枝而裊裊無心而應獬冠之觸何殊有佞則知
金鏡之洞已早至若元愷登而僉壬化明良慶而庶績
熙雖間生于堯代實藏用于明時對右平兮左城承日

照兮風披千官劍珮三殿威儀則屈軼亦呈其瑞而已
矣又安得夫邪佞而指之

六藝賦

居高齋以遠紹娛情志于典墳藉義府之息游望宮牆
其聿新伊六藝之為懿雖宿儒而必親予下學其何知
敢玩愒而不遵矧夫禮緣情以制物樂平情而返初射
必先乎正直御必範乎馳驅書貴六文之不忒數窮大
行而有餘于身為終始之伴于道為行邁之輿請為言
其美備俾達者其聽諸原夫禮儀三百威儀三千既安
上而治民亦緯地而經天其制之也必傳道之聖其行

之也必守道之賢郊廟有饗祀之典朝宁有聘會之虔
尊尊則衣冠拜舞親親則酬酢蕃駢尊卑賴以等殺進
退恃以周旋是蓋禮之大者而其細尤莫能以盡焉粵
自軒轅雲門定樂溯原必本于中和相濟必分其清濁
以歌則管聲噦噦以舞則鷺羽翯翯五音六律之交宣
八風九歌之相續審音兮旣換羽而移宮吹律兮復度
商而揣角入耳兮躁心以釋傾聽兮欲心以平雖宜觀
于韶舞必先放乎鄭聲以宣民志以和民情惟樂舞之

至正斯風俗其可成若夫敦弓旣堅四侯旣均可緣此而觀德亦因之而序賓在澤在宮必有一定之制少算多算難奈不易之倫騶虞之節今天子所用狸首之風兮諸侯是陳慎其所舉取制于中聖王合射以明教男子蓬矢而桑弓在昔宣尼曰執御矣平心正體兮在茲自下奉上兮以此四黃旣駕兮總轡分鑣兩驂不倚兮過都越鄙追電兮逐風發軔兮殪兕鄙組舞于東野羨辭乘之王良愛蘧瑗之過闕馳造父于康莊孰謂御為

賤役非君子之所方哉至若畫始羲皇字肇蒼頡史載
觀于蹄迹易稱代乎繩結百官以治今宣猷萬民以察
今仰哲迨書契之大明快苞符之盡洩于焉猶斯造乎
前驅羲獻繼乎後乘文皇飛白張顛草聖顏柳法嚴蘇
黃筆勁雖歷代有作者要悉歸乎心正若乃司天之職
推步萬端黃鍾定其分至玉律辨其暑寒旣參天而兩
地亦稽坤而考乾下至內府外府之歲會郊人塵人之
定田無一則何以成十有百則至于累千參伍而其法

備錯綜而其數全豈若商鞅近功始按人而立稅弘羊
心計算舟車與緡錢蓋所以裕國計敬昊天惟損上而
益下乃自古而云然懿茲六藝用藉尋求若行遠兮駕
車若溯川兮泛舟嗟不學兮面墻期佩服兮優游庶不
忒兮我心用黽勉兮前修

欽定四庫全書

皇清
卷十七

日方升賦

伊蒼旻之懸象兮，煥二曜之重明。麗中天以臨照兮，終萬古而健行。分宵旦之行藏兮，仰瑞應于升恒。維光華之烜爛兮，百昌欣以向榮。偉魄淵之繼照兮，請仰觀旭日之方升。明萬彙其伊始兮，符天心之生生。方其玉繩罷繫，斗杓收指，望舒隱曜，以西馳啟明，藏輝而遠徙。覽東方其生白，眇海水而煥紫滄溟，罷浴駕羲御以遄征，火馭載臨邁天衢，其自此璇圖不忒兮，正羲仲之寅賓。

玉律無差兮合容成之步晷銀蚪渴兮燭龍翔陽鳥飛
兮曜靈揚出渤澥兮經若木歷暘谷兮拂扶桑瀛海燐
燐洗寶輪而皎潔咸池炳炳拱神鏡以汪洋玉衡隱約
兮低度瑤華烜赫兮含章照彼鮫宮添輕綃之晃朗射
茲龍窟增寶藏之輝煌則見金門初啟玉漏停傳天雞
喚兮報曙寶鼎列兮生烟陽侯執轡兮炫彤墀之璀璨
后羿揚麾兮催青瑣之班聯雲旗縹緲兮映百川之會
海霞車陸離兮靄萬國之朝天此出震一人之有慶向

離敷治以無偏者也至若六街香霧九陌紅塵曙色方
升晉謁之驄駟晨光乍爛計偕之車軫轡瞻祥光之
錯落覩瑞靄之氤氲此王路馳驅之士鸞翔鵲起而欣
欣者也又若幽人曠逸竿甫逾三學士清嚴甑未倍四
梳翻雲髻今曉景透乎香閨經開貝葉今晨鐘鳴乎古
寺舟橫野渡今驚月落而烏啼獵合平原今喜黃牽而
蒼臂草木向曙以敷榮飛走和鳴而得意此又臨照無
私恩光遍及于萬類者也斯時也後天一度而輝燭于

大荒出地咫尺而宣耀于無疆夜光無所施其用火齊
無可耀其光杖何為兮誇夸父戈何為兮稱魯陽郭何
用兮其豐繩何施兮其長考盈虧兮何與驗中是兮無
妨若太極兮始判而將分如元會兮方流而未央又何
必紀合璧于伊耆之代舉抱戴于晉帝之堂侈談王字
之瑞徒稱五色之光哉客有興寄泰山之嶠神游日觀
之峰睹初陽之煒煜攬顥氣之冲融開懷抱暢心胸鄙
熊曜瑯琊之迹追青蓮登眺之蹤將游心乎太始觀造

物之元功

水輪賦

削竹爲管，揉木爲輪。假廣川之利潤，代膏雨之洪恩。因
時制宜，奚必資乎匠伯？澤民利物，乃有待于梓人。爾其
東作云興，西成在望。大田多稼，或懷旱魃之憂；密雲不
雨，每厯旻天之貺。雖抱甕之勤，奚爲即挈瓶之利？亦讓
于是轉岸上之飛輪，汲江中之巨浪。方來旋去，詫機軸
之周環；已納而吐，欣洪波之奔放。劃如雷鼓之聲，翩若
飛鳧之狀。揚清激濁，今大澤旁；通救患分災，今連畦滋。

暢鄙桔槔之小惠殊轆轤以致功匪疾匪徐兮運旋而
不竭突如來如今灌注而莫窮盈科而進今施有次第
轉轂而輸兮用無始終流洋洋兮比潤甘霖苗薿薿兮
同舒律暖垂稻穗兮壟畝勻黃築場圃兮篝車載滿是
知輪者木之體旣巽順而有功水者坎之盈亦剛中而
有信相資以濟引重之象何殊因物而施救嘆之功以
迅敬陳澤物之奇勲用備風人之雅訓

文戰賦

甚矣人之好爭也軒尤鼓怒于凶器羿浞鬪技于霜鋒
賁育逞力于舉重般婁恃巧于雕蟲良增驚智于劉項
儀秦馳辨于橫從是蓋所居者高則惡人之我並所操
者異則嫉人之我同未有解構釋紛齊天地于一指和
光同塵歸大化之元宗者也吾意文人學士知命樂天
謙卑自牧慎重為先其游心于淡也若太羹之味其麗
澤相滋也若共濟之船宜其煦煦為儒魚魚為賢不惡

我之或後不憎人之或前而孰知所謂文戰者更有甚
于前言當其屬詞鋒排筆陳萬夫之雄莫擬六籍之奧
並進徹札之鏃必期乎中堅露穎之囊何妨于游刃
視而張弛咸宜虎變而雷霆用震于是綳帙繽紛盡作
鼓輦之響絳帷掩映俄興旌旆之思呼十二之龍賓發
攄奇策揮五千之文字奮迅偏師臨局早分其勝負當
場疊用其正奇弟子降心而斂手先生談笑而解圍是
蓋厲兵于學海藏甲于文山請纓同弱冠之子投筆似

定遠之班硯石如砥分紀功莫盡霜毫飛白兮露布爰
頒齊物子見而笑之曰是蓋以文為戰者夫文以載道
而又何戰乎請與子解干戈之擾而歸洪荒之都

景陵瑞芝賦

蓋聞王者孝慈則芝茂又曰君有至德則芝生仁恩覃
敷于率土草木爰叶夫嘉禎考夫瑞應之圖稽乎符命
之經未有治功允協乎邳理而祥應不驗于山靈者也
欽惟

聖皇御世敬

天法

祖煦嫗之澤比陽春汪濊之恩如膏雨亮工則克諧三

事歌敘則允治六府凡溥大化于雍熙悉循

聖祖之遺矩

上帝是鑒靈瑞斯頻河清海晏之紀麟遊鳳集之文與
夫嘉禾甘露之迭見蓋不可以指數陳是皆

一人格

天之元功而厚澤永逮夫生民者也乃若瑤光發辰象
之精金色吐陰陽之秀衍

鼎湖兮億載休徵鞏

福地兮萬年鴻祐繽紛芝采表

聖祖盛德之常新煥爛芝房驗吾

皇孝思之孔厚金枝瓊葉浥瑞露于

寶城十色九光燦祥霞于仙囿鏤珊瑚而作幹葩蓋高
擎肖龍鳳以呈形卿雲低覆氤氲並日月以爭華蔚靄
與松楸而並茂豈與夫生于石室產自珠宮王母之臺
虛紀宓妃之館成空秀甘泉之庭而傳誇晉帝產延英
之座而稱美唐宗也哉

聖聖同揆德惟其至旣丕顯而丕承信格

天而格

地嘉祉効乎百靈景運凝乎二氣謹拜手而颺言賦太
平之至瑞

春蒐賦

文武之道一弛一張政以則乎四季令如煥乎三光其
禮則備其文則詳雖寓意乎簡卒亦致戒乎禽荒故當
春氣之始和行蒐禮而如常蓋所以開三面儀萬方豈
云魚必殲其鯢鯪獸必索其羶羊者哉于斯時也東作
未興猶是三農之隙孳尾未接豈妨百獸之生春蠢也
爰宣威以象動蒐求也乃法古以考成進退疾徐固將
明其紀律勾擊搏刺亦莫過乎縱橫藉以整軍豈惟逐

獸六軍之節制可觀三畋之儀文斯究安不忘危今經
國之典斯存用而有節今胞與之仁在宥乃足賓筵用
供乾豆此以見國家之大體可以比先王之蒐狩不然
者苟非黷武即屬從禽于是乎有風人之刺禹甸之箴
子雲所以賦羽獵相如所以諷上林又豈君人者之以
天地之心為心者哉

皇清文頴卷首十七